

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

März 2019

von Helen Alba

## Kischtelekwar un Stickerkuche

Mir kenne uns sicher alli dran erinnere, wie des selmols war, als mer sowohl uf de Derfer als ach in der Stadt in der sogenent „Alimentara“ inkaaft han. Die Auswahl war selmols karg. Wanns gheescht hat: „es is War kumm“!, han sich die Leit schun in die Reih gestellt, obzwar se oft gar nit gewisst han, for was se sich eigentlich anstelle. Desmol will ich iwer e „War“ schreibe, die arich Anklang gfunn hat: die Kischtelekwar. Mer hat se sogar mitm Messer schneide kenne, so fescht war se. Hat awer gut gschmeckt. Es soll e Mischlekwar aus allerlei Obst gewenn sin. Sicher han die Hausfraue ach Prunje- un Aprikoseschmier gekocht. Doch hat mer vill Lekwar verbraucht: for Kuche backe un vill is ufs Brot gschmiert gin. Sowohl morjets zum Tee hats Lekwarbrot gin, awer ach die „Beme“/Senwitsch for in die Schul un sogar Arweit ware zwaa Range Brot, derzwischen is Lekwar kumm.

Un weil mer die Kischtelekwar so gut transchiere hat kenne, weil se im Kuche nit verloff is, is se vill verwend wore: Schmeerkipfle, geele Strudl un Stickerkuche sin oft gebackt gin. For was mer Stickerkuche gsaat hat?

Wann e Gerwetaich gang is un ufs Nudelbrett kummt, werd er ausgewalchert un in viereckichi Sticker gschnid. In jedes Stick kummt e Toope Leckwar, dann were se iwernaner gschlaa. Es Blech werd ingschmiert mit bissl Fett, druf git Zucker gstreit. De Backowe git vorgheizt. Die Sticker kumme ins Blech, derdriwert werd bissl Milch (mit Zucker un Zimet vermisch) gepenselt. Un dann werd gebackt un anschliessend natierlich gess!

Was mer gebraucht hat

Ja, dorte hat mer frieher alles kriet,  
uf was die Mensche Gusta han vergspiirt:  
Krumber-, Stangezucker un a Knappe,  
ohne Drängerei un villes Stuppe.

Die Leckwar, in Kischtle scheen verpackt,  
dermit hat unser Oma Kuche oft gebackt.  
Mer hat se schneide kenne un a schmiere Brot,  
de Stickerkuche is am bescht dermit gerot.

Es Sunneblumeel, des war in grosse Fässer.  
Dorte drin war so e Pump un a e Steeser.  
Die Leit sin kumm mit Flasche, han die gfillt  
selmols hat mers Fleisch gebrod un nit gegrillt.

De Vinga-Tschokoladi hat gut gschmeckt.  
Jeder hat sei Fingre noher abgeleckt.  
Un Kandiszucker, Knappe uf der Schnur,  
vun all dem is jo jetzer kaum e Gspur.

Allewitschka, Halwa un derzu Rahat,  
alles hat de Kaufmann uf Stellasche ghat.  
Dernewert Dattle, Feije un Ziwewe kiloweis,  
Pumrantsche – alles zum angeschriebne Preis.

Was mer grad gebraucht, des hat mer kaaft.  
Ohne Ängschter, dass es Gschäft weglaaft.  
Er war an jedem End vum Dorf, ach in der Mitt,  
tachiwer uf. Un zu, wanns Betloch hat gelitt.